

atu ki Paraeroa, ka mau atu ki te matamata o Parimahu, ka puta ki te moana. Ka ahu ki te tonga ka mau ki te ngutu awa o Porangahau, ka mau ki te ngutu awa o Whangaehu ka mau ki te Poroporo, ka mau kite ngutu awa o Tautane ka tutuki ki Waimata ki te timatatanga.

No. 2. Me whakatu he Poari whenua Maori mo ia takiwa mo ia takiwa. Ko nga mema mo taua Poari ko te Komihana o nga Whenua o te Karauna me etahi Pakeha tokorua ma te Kawana raua e whakatu, me etahi Maori tokorua me ata pooti raua mo nga tau e toru e nga tangata Maori no ratou nga whenua Maori i roto i ia o aua takiwa.

*Kupu Apiti.*—E whakakorea atu ana tenei wahi o te rarangi, te ingoa Komihana. Engari me tu kia rua nga mema Pakeha kia rua nga mema Maori. Ko te komiti poraka ki raro i a ratou. Ko aua mema Maori no roto ake i taua rohe, me te komiti poraka hoki.

No. 3. Me utu nga mema o te Poari nga Pakeha nga Maori ki nga utu tau me era atu utu hoki e whakaaetia e te Paremete i ia wa i ia wa. Kua paahitia tenei rarangi i runga ano i tona ake tikanga.

No. 4. Me tu ko te Komihana o nga Whenua o te Karauna hei Tiamana mo te Poari i runga i tona tuunga Komihana, engari me whai pooti whakatau anake ia, a ki te ngaro atu ia me whakatu e ia tetahi o nga mema Pakeha hei Teputi Tiamana.

*Kupu Apiti.*—E whakakorea atu ana tenei wahi o te rarangi, te ingoa Komihana kua tu hei Tiamana engari me tu ia hei Tumuaki mo nga Poari katoa o te koroni. Engari me tu ko tetahi o nga mema Pakeha hei Tiamana. Ki te ngaro atu taua Tiamana i runga i te mate, i nga raruraru nui ranei i pa ki a ia me tu tetahi o aua mema Pakeha hei Teputi Tiamana.

No. 5. Me whai pooti te Teputi Tiamana pera me era atu mema, me te pooti whakatau hoki. Kua paahitia tenei rarangi i runga i tona ake tikanga.

No. 6. Ka whai korama te Poari ina ka noho nga mema e toru, engari kia kotahi o ratou maha atu ranei me Maori. Kua paahitia tenei rarangi i runga i tona ake tikanga.

No. 7. E kore te Ture e whakakore i te mana mema i te tau 1878 e pa ki nga mema Maori o te Poari. Kua paahitia tenei rarangi i runga i tona ake tikanga.

No. 8. Ko te whakaaetanga kia whakahaerea nga tikanga o tenei Ture i roto i etahi takiwa e taea ana i runga i te peneitanga ara, ka taea e te Kawana te whakamana i runga i te pitihana a etahi tangata kia rua tekau maha atu ranei o nga tangata no ratou nei te whenua. Kua paahitia tenei rarangi i runga i tona ake tikanga.

No. 9. I te taenga o te pitihana ki te Kawana, me perehi e ia ki roto ki te *Gazette* me te *Kahiti*, me tono hoki kia whakaaturia mai nga kupu whakahe. Kua paahitia tenei rarangi i runga i tona tikanga.

No. 10. Ki te puta te kupu whakahe o nga tangata rua tekau o era atu o nga tangata Maori no ratou te whenua ki te pitihana, me whakatau taua mea i runga i te pooti a nga tangata katoa no ratou te whenua.

*Kupu Apiti ki te No. 10.*—E whakahengia atu ana tetahi wahi o tenei rarangi, te kupu pooti, engari me whakatau i runga i te kaha o o ratou take.

No. 11. A te whakaaetanga kia whakahaerea nga tikanga o tenei Ture i roto i tetahi takiwa, me tau nga whenua ki te Poari, me te whai mana ano o nga riana me era atu taunaha e tika ana i runga i to te Ture tikanga, ko te tikanga o tenei kupu whenua Maori, he whenua papatipu me era atu whenua a nga Maori, haunga ia nga whenua kua hokona e ratou i te Karauna i te Pakeha ranei, whenua ranei e tau nei nga tikanga o nga Ture e whai ake nei ki runga.

*Kupu Apiti ano mo te No. 11.*—E whakakorea atu ana tetahi waahi o tenei rarangi, me tau nga whenua ki te Poari, engari me tau nga whakahaerenga o nga whenua ki te Poari: "Te Ture mo nga Takiwa Ngawha, 1888"; "Te Ture Whenua Rahui i Poutini me Whakatau, 1887"; "Te Ture Whakatau Rahui o te Tai Hauauru, 1892"; me "Te Ture Taone Maori, 1895."

No. 12. Ka whai mana te Poari ki te rihi i nga whenua Maori mo te wa kia kaua e neke ake i te rua tekau ma tahi nga tau me te whakauru, mo te kore whakauru ranei i te kupu whakaae kia whakaroaina te rihi mo tetahi atu wa kia kaua e neke atu i te rua tekau ma tahi nga tau i raro i nga tikanga o nga huarahi whakahaere, kei ta te Poari e whakaaro ana e tika ana te ritenga. Kua paahitia tenei rarangi.

No. 13. E kore e taea te hoko te whenua i roto i tetahi takiwa kua whakaaetia kia whakahaerea nga tikanga o tenei Ture i roto i muri iho i tenei, haunga ia te mahi whakaoti i etahi tikanga mo te hoko i timataria i runga i to te ture ritenga i mua i te paahitanga. Kua paahitia tenei rarangi i runga i tona ake tikanga.

No. 14. E whai mana ana te Poari ki te wehe i etahi whenua hei, wahi mahinga, hei wahi nohoanga mo nga tangata no ratou te whenua i runga i nga tikanga me nga ritenga e whakaroahia ana e ratou e tika ana, me te wehe hoki i etahi whenua hei urupa, hei tuunga kura, he tuunga whare karakia, mo etahi atu tikanga ranei e pai ana mo te katoa. Kupu apiti, kua whakaurua atu tenei kupu, ma te whakaae ra ano o te komiti poraka ka whai mana ai nga tikanga o tenei rarangi.

No. 15. I te tukunga whenua Maori i runga i te rihi, me matua whakahaere te Poari i te tikanga mo nga tono rihi a nga tangata Maori mo ratou te whenua. Kua paahitia te rarangi i runga i tona ake tikanga.

No. 16. Ka ahei te Poari ki te whakahaere tikanga mo te tuku whenua Maori ki te Kuini, mo te mahi maina i runga i nga tikanga o "Te Ture Maina, 1891," ko nga moni e puta mai ana i nga whenua pera katoa i runga i te mahi maina me utu atu e te kai-whakahaere o te whenua mahi koura ki te Poari, hei painga mo nga tangata no ratou te whenua. Kua paahitia tenei rarangi, engari ka whakaurua atu tenei kupu, ma te whakaae ra ano o te komiti poraka me nga mema o te Poari ka whai mana ai nga tikanga o tenei rarangi.

No. 17. Ka ahei te Poari ki te whakahaere moni i runga i te mahi hanga, whakapai hoki i nga rori, tiriti, me te mahi ruri, me te whakatuwhera whenua i runga i te ritenga whakanohonoho tangata,